

## DOMENIE XVII «VIE PAL AN»

### Antifone di jentrade Sal 67,6-7.36

**C**hest al è Diu te sô sante cjase.

Diu al torne a menâ a cjase chei che si jerin pierdûts,  
al è lui che i dà al popul fuarce e vigorie.

### Colete

Diu, protetôr di chei che in te a sperin  
e che cence di te nol è nuie di valit e di sant,  
moltipliche sore di nô il to boncûr  
par che, tignûts sù e guidâts di te,  
o imparin a doprâ lis robis che a passin  
in mût di restâ plui tacâts a di chês che a durin par simpri.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE 2 Re 4,42-44

**Int mangjaran e ur vanzarà.**

Dal secont libri dai Rês

In chei dîs, al rivà un om di Baal-Salise e i puartà al om di Diu pan fat cu lis primiziis, vincj pans di  
vuardi e di forment ancjemò tal so spi. Liseu al ordenà: «Dàur ai oms, che a mangjin!». Ma il so  
famei i rispuindè: «Cemût podaressial rivâ chest par cent di lôr?». Lui al continuà: «Dàur di mangjâ  
ai oms, parcè che il Signôr al dîs cussì: Int mangjaran e ancjemò ur vanzarà». Lui ur al esibì, lôr a  
mangjarin e int restà, seont la peraule dal Signôr.  
Peraule di Diu.

### SALM RESPONSORIÂL dal Salm 144

**R.** Spalanche la tô man, Signôr, e sostente ducj chei che a vivin.

Che ti laudin, Signôr, dutis lis tôs creaturis,  
che ti benedissin ducj i tiei fedêi.  
La glorie dal to ream che a contin,  
dal to sflandôr che a fevelin. **R.**

I vôi di ducj viers di te si voltin e ti spietin,  
e tu tu ur dâs di mangjâ su l'ore juste.  
La tô man tu tu spalanchis  
e tu sostentis fin avonde ducj chei che a vivin. **R.**

Il Signôr al è just in dutis lis sôs stradis,  
sant in dutis lis sôs voris.  
Il Signôr ur sta daprûf di ducj chei che lu clamin,  
di ducj chei che lu clamin cun scletece. **R.**

### SECONDE LETURE Ef 4,1-6

**Un cuarp sôl, un sôl Signôr, une sole fede, un sôl batisim.**

De letare di san Pauli apuestul ai Efesins

Fradis, jo, il presonâr pal Signôr, us invidi a vivi une vite degne de clamade che o vês vude, cun dute  
umiltât e biel trat, cun pazience, sopuartantsi un cul altri cun amôr, preocupâts di mantignî l'unitât  
dal spirt cul leam de pâs: un cuarp sôl e un sôl spirt, cussì come che o sês stâts clamâts a une sole

sperance, che e je la vuestre clamade; un sôl Signôr, une sole fede, un sôl batisim; un sôl Diu e pari di ducj, che al è sore di ducj e al opere midiant di ducj e al è in ducj.  
Peraule di Diu.

### CJANT AL VANZELI Lc 7,16

R. Aleluia, aleluia.

Un grant profete al è comparît framieç di nô:  
Diu al è vignût a viodi dal so popul.

R. Aleluia.

### VANZELI Zn 6,1-15

Al dè fûr ai presints fin che int volevin.

Dal vanzeli seont Zuan

In chê volte, Jesù al lè di chê altre bande dal mâr di Galilee, ven a stâi di Tiberiade. I leve daûrji une vore di int, parcè che a viodevin i spiei che al faseve sui malâts. Alore Jesù al lè su la mont, e li si sentà cui siei dissepui. E jere dongje la Pasche, la fieste dai Judeus. Jesù, alçant i vôi e viodint tante int a vignî di lui, i dîs a Filip: «Dulà podaressino comprâ il pan par dâur di mangjâ a ducj chei chi?». Al diseve cussì par metilu a lis provis; di fat lui al saveve benon ce che al stave par fâ. I rispuint Filip: «Dome par dânt un tocuto parom, no 'nd è vonde di dusinte denârs di pan». I dîs un dai siei dissepui, Andree, fradi di Simon Pieri: «Al è chi un frutut che al à cinc pans di vuardi e doi pes. Ma ce isal chest par tante intone?». Ur disè Jesù: «Fasêtju sentâ». Ind jere in chel lûc un grum di jerbe. Si sentarin duncje i oms, un cinc mil di lôr. Alore Jesù al cjapà i pans e, dopo di vê fat il ringraziament, ju dè fûr a di chei che a jerin sentâts, e cussì ancje cui pes, fin che int volevin. Cuant che a forin ducj passûts, ur dîs ai siei dissepui: «Tirait dongje i tocs vanzâts, par che nol ledi straçât nuie». Ju tirarin dongje e a jemplarin dodis cestis di tocs di chei cinc pans di vuardi che ur jerin vanzâts a di chei che a vevin mangjât. Viodût il spieli che al veve fat, chei oms a disevin: «Chest mo sî che al è il profete che al à di vignî tal mont!». Ma Jesù, savût che a stavin par rivâ e puartâlu vie par fâlu re, si ritirà di gnûf su la mont, lui di bessôl.  
Peraule dal Signôr.

### Su lis ufiertis

Acete, Signôr, i regâi  
che ti presentin pe tô gjenerositât  
par che chescj misteris sants, cu la virtût de tô gracie,  
a santifichin i dîs di cheste nestre vite  
e nus menin a la gjonde eterne.  
Par Crist nestri Signôr.

### Antifone a la comunion Sal 102,2

Benedis, anime mê, il Signôr,  
e no sta lassâ in dismentie nissun dai siei plasês.

### O ben: Mt 5,7-8

Furtunâts chei che a àn misericordie, parcè che a cjataran misericordie.  
Furtunâts i monts di cûr, parcè che a viodaran Diu.

### Daspò de comunion

O vin gjoldût, Signôr, il sacrament dal cîl,  
memorie eterne de passion di to Fi;  
fâs, par plasê, che al zovi pe nestre salvece  
chest regâl che nus à dât tal so boncûr cence fin.

Lui che al vîf e al regne tai secui dai secui.